

PECCHI' CIANGI'A

Nc'era 'nu patri mònacu barvùtu,
chi ppredicàva ch'era 'nu talentu,
no stava mai 'nu morzu a lu cumbentu,
d'ognùnu era cercàatu e mbembolùtu.

Girava chi pparìa 'n'animulèdhu
di 'nu pajìsi a 'nn'atru, ogni mumentu ,
e nno nd'avìa riposu e mmancu abbentu ,
riggettu e non nd'avìa lu ceravèdu.

Capitàu pemmu prèdica 'na vota
Dintr'a 'na chiesijèda di montagna,
cu li previti tutti 'ncappa magna ,
'mmenzu a la ggenti simprici e devota.

'Na candila storciuta fumijàva ,
e 'ncenzu e ffumu all'aria s'irgìa ,
festa era di la Virgini Maria ,
li preggi soi lu monacu vantava.

Lu prùffitu tremava. Ammenzu a ttanti,
a bbucca aperta a cchidhu chi ddicia ,
nc'era 'na vecchiarèdha chi cciangìa,
ciang'a mu ntennariscinu li Santi ...

Lu monacu restàu maravigghiàtu
Vidèndu tanta fidi e cummozzioni
E, ampèna terminata la funzioni,
lu prùffitu dassàu tuttu sudàtu.

L'acciprèviti 'ntantu l'aspettava
'mmenzu a la porta di la secristìa ,
-- pròsiti, patri , pròsiti! – nc'icìa
e, sutta sutta, tuttu s'scialava.

-- Predichi , panaggirici e sermùni
ndi fici a ccentinàra ‘mbita mia ,
mma nudhu vitti tantu chi cciangìa
simuli a cchida vecchia ‘nginocchiùni !

Chiamatimilla ‘ntra la secrestìa ,
-- dissi – vògghiu mu sacciu la raggiùni ... --
Lu secristanu fici ‘nu zzumpùni
E ppoi tornàu cu cchida chi bbolìa.

-- parlati puru – dissi –bbona donna,
dicìtimi , pecchè ciangìvu tantu ??
quali fudì lu mèritu o lu vantù
chi nci tessìa cchiù bbedhu e la madonna ? –

La vecchiarèdha , gralimùsa ancora,
lu monacu guardau tutta ‘ncantata
poi ,abbasciandu la testa scunzulàta,
li palòri ‘ncignàu mu tira fora :

-- Quando vui predicàvu , patri santu ,
jeu no ppenzàva a cchidhu chi ddcìvu
era ‘n’atru , cchiù ggrossu , lu motivu
di tanta commozioni e ttantu chianti ...

Focu mi catti patri , e mmi cocù,
vi guardava ssa vostra barvicèdha ,
la stessa chi nd’avia la crapettèdha
chi quattro jorna arrètu mi morìu ! –

Francesco Laruffa

www.associazionelaruffa.org